

U V O D

Turizam je značajna oblast privrede, te i čitave ekonomije BiH. Obzirom da nakon rata to i nije nešto sa čim se možemo pohvaliti, što zbog neadekvatne pravne regulative, složenog sistema organizovanja države, te i resora turizma, to i zbog indiferentnosti osoba zaduženih za turizam. Neophodno je hitno animirati sve organe, institucije zadužene za turizam i napokon ovoj grani dati zasluženno mjesto u državi, a time lakše i u gradu na Neretvi.

Kroz temu svog diplomskog rada nastojaću opisati šta učiniti kako bi turizam dobio mjesto koje zaslužuje konkretno u Mostaru, te prednosti koje razvoj ove oblasti donosi konkretnom području, uz, naravno, adekvatne ekološke i druge neophodne elemente, što se svakako može odnositi i na ostala mjesta u Bosni i Hercegovini.

Tema mog diplomskog rada određuje i cilj istraživanja, kako u samom naslovu kaže "Mogući pravci razvoja turizma u Mostaru."

Obzirom da je Mostar grad sa dugom turističkom tradicijom, te da je posljednjih godina izražen tzv. tranzitni turizam, kroz svoj rad pokušaću podstaknuti institucije grada da privuku domaće i strane turiste da borave u Mostaru, da upoznaju njegovu istoriju i tradiciju, njegove prirodne ljepote, da kroz "paket aranžman" upoznaju grad i njegovu okolinu. Nalazeći se u centru Hercegovine, na putu ka jadranskoj obali, te Međugorju kao poznatoj vjerskoj destinaciji kršćanske religije, obogaćivanje turističke ponude trebalo bi se fokusirati na produžavanje boravka tranzitnih turista. Po meni postoji više mogućih pravaca razvoja turizma u Mostaru, podjednako važnih i to: tranzitni, kulturni, vjerski, eko turizam, turizam na vodama, lovni i ribolovni, festivalski i kongresni, avanturistički, rekreativni i seoski.

Za razvoj turizma kao masovne pojave u svijetu, velikom rastu broja turista, doprinjeli su dosta uslovi života u gradovima gdje je mnogo betona i asfalta, visokih zgrada i ulica, mnogo ljudi i automobila, mnogo buke, nečistog vazduha, smoga... brz tempo života... Pravi odmor moguć je jedino u uslovima čiste prirode i povoljne klime. To treba biti osnova za razvoj turizma u Mostaru.

S obzirom na prirodne ljepote, kulturno-istorijske vrijednosti, pogodne klimatske uslove i geografski položaj Mostar jeste i može se ozbiljnim radom svih institucija i stanovnika održati među vodećim bosansko-hercegovačkim, pa i svjetskim turističkim destinacijama.

U nadi da će moj rad doprinjeti barem za jedan stepen poboljšanju turističke ponude grada, možda i nekom preduzetnom građaninu da sam pokrene biznis koji će obogatiti turističku ponudu grada, pokušaću otkriti i pokazati put za otklanjanje uzroka, te dati ideje za nove šanse proširenja turističke ponude.